



Na osnovu člana 13. Zakona o principima lokalne samouprave u Federaciji BiH („Službene novine Federacije BiH“, broj 49/06 i 51/09), članova 12. i 25. Statuta Općine Stari Grad Sarajevo - prečišćen tekst („Službene novine Kantona Sarajevo“, broj 20/13), i Odluke o dodjeli u zakup poslovnih zgrada i poslovnih prostora Općine Stari Grad Sarajevo i rasporedu poslovnih djelatnosti na području Općine Stari Grad Sarajevo-prečišćen tekst („Službene novine Kantona Sarajevo“, broj: 2/20), u nastavku 39. sjednice održane dana 29. 06. 2020. godine, Općinsko vijeće Općine Stari Grad Sarajevo, je donijelo:

P R A V I L N I K
O STIPENDIRANJU UČENIKA/ŠEGRTA
IZ OBLASTI DEFICITARNIH I STARIH TRADICIONALNIH
ZANATA-OBRTA/ZANIMANJA

OSNOVNE ODREDBE

Član 1.

Pravilnikom o stipendiranju učenika/šegrti iz oblasti deficitarnih i starih tradicionalnih zanata-obrta/zanimanja (u daljem tekstu Pravilnik) utvrđuju se, način i kriteriji stipendiranja istih, a koji su državljani Bosne i Hercegovine, imaju prebivalište na području Općine Stari Grad duže od pet godine i nalaze se na redovnom školovanju u srednjim školama i za šegrti, koji zvanje stiču kod majstora starih zanata, a nisu stariji od 20 godina prilikom podnošenja aplikacije.

Član 2.

Pravo na stipendiranje po ovom Pravilniku imaju učenici srednjih strukovnih škola (deficitarni obrti) koji pohađaju obrazovanje koje traje 3 (tri) godine, a koji nisu obnavljali godinu, a koji su u prethodnoj školskoj/akademskoj godini postigli uspjeh sa najmanjom prosječnom ocjenom 3,00 i šegrti koji zvanje stiču kod majstora starih zanata-obrta.

Po ovom Pravilniku pravo na stipendiranje imaju učenici/šegrti koji se školuju za sljedeća zanimanja:

1. Deficitarni obrti: vodoinstalater, keramičar, električar, tapetar, dekorater, optičar, obućar, krojač, limar, bravar, staklar, hemijski čistač, zlatar, slikanje na tekstilu i tekstilnim vlaknima i keramici;

2. Stari - tradicionalni obrti: filigranist, kujundžija, graver, kazandžija, puškar, krojač narodnih nošnji i odijela, krznar, krojač krzna i kože, remenar, sedlar, rukavičar, kapar, šeširdžija, proizvođač papuča (papudžija), časovničar (sahadžija), staklar, obrađivač optičkog stakla, staklopuhač, jorgandžija, oštrač, kovač, tašnar, izrađivač nanula i klompi, dimnjačar, brijač, užar i izrađivač vrpce (gajtandžija), bojadžija, kaligraf, grnčar.

Član 3.

Komisija zadržava pravo da u skladu s Odlukom o dodjeli u zakup poslovnih zgrada i poslovnih prostora Općine Stari Grad Sarajevo i rasporedu poslovnih djelatnosti na području Općine Stari Grad Sarajevo dodijeli stipendiju u cilju zaštite deficitarnih i starih tradicionalnih zanata-obrta, za zanimanje koje nije eventualno navedeno u ovom Pravilniku.

STIPENDIRANJE

Član 4.

Na prijedlog Načelnika, u tekućoj školskoj godini, stipendirati će se učenici/šegrti za navedena zanimanja kako slijedi:

- a) Učenici I, II i III razreda srednjih strukovnih škola (deficitarni obrti/zanimanja) obrazovanje u trogodišnjem trajanju;
- b) Šegrti, koji zvanje stiču kod majstora starih zanata-obrta (stari tradicionalni obrti);

Član 5.

U skladu sa potrebama i nivoom planiranih finansijskih sredstava za stipendiranje starih tradicionalnih i deficitarnih zanata-obrta/zanimanja, Općinski načelnik donosi Odluku o dodjeli stipendija za tekuću školsku godinu.

Postupak o dodjeli stipendija provodi Služba za obrazovanje, kulturu i sport, a isplata stipendija precizira se ugovorom o stipendiranju.

Član 6.

Stipendije se dodjeljuju za tekuću školsku godinu i isplaćuje se za 9 mjeseci (septembar-decembar i februar-juni).

Član 7.

Visina mjesečne stipendije za deficitarne i stare tradicionalne obrte/zanimanja iznosi 80,00 KM mjesečno.

Član 8.

Ukoliko bilo koji od aplikanata ostvari pravo stipendiju od nekog drugog fonda, institucije ili po bilo kom drugom osnovu, isti se briše sa bodovne liste, s tim da sljedeći aplikant ostvaruje pravo na općinsku stipendiju. Ovaj princip primjenjivat će se i u slučaju ukoliko ne bude dovoljan broj aplikanata prijavljenih za stipendiranje deficitarnih zanat-obrta/zanimanja, stipendije će se dodijeliti aplikantima starih tradicionalnih zanat-obrta/zanimanja i obrnuto, a sve u okviru predviđenog Plana stipendiranja.

SREDSTVA

Član 9.

Po utvrđenom Planu stipendiranja deficitarnih i starih tradicionalnih zanat-obrta/zanimanja u općinskom budžetu se obezbjeđuju ukupna sredstva potrebna za stipendiranje i to u procentualnom iznosu od 50% za aplikante navedene u članu 4.a i 50% za aplikante navedene u članu 4.b od ukupno planiranih budžetskih sredstava za ove namjene.

IZBOR KANDIDATA

Član 10.

Izbor aplikanata za stipendiranje vrši se na osnovu kriterija iz člana 14. ovog Pravilnika, a putem prijave na Javni poziv.

Javni poziv raspisuje Općinski načelnik putem Službe za obrazovanje, kulturu i sport.

Javni poziv sadrži: uslove koje aplikant mora ispunjavati, rok za podnošenje prijave i druge potrebne podatke.

Javni poziv se objavljuje u dnevnim novinama i zvaničnoj web stranici Općine i to do 31. oktobra za tekuću školsku/akademsku godinu.

Član 11.

Izbor aplikanta vrši Općinski načelnik na osnovu prijedloga Komisije za izbor kandidata - korisnika općinske stipendije, u skladu sa kriterijima utvrđenim ovim Pravilnikom, o čemu informiše Općinsko vijeće.

Komisiju za izbor aplikanata - korisnika općinske stipendije posebnim Rješenjem imenuje Načelnik Općine.

Komisija je sastavljena od tri člana i to jedan predstavnik Komisije za privredni razvoj, zanatstvo, turizam i međunarodnu ekonomsku saradnju i dva predstavnika Službe za obrazovanje, kulturu i sport.

Član 12.

Sa izabranim aplikantom zaključuje se ugovor o dodjeli stipendije kojim se regulišu međusobna prava i obaveze učenika i Općine Stari Grad Sarajevo.

Ugovor potpisuje aplikant, roditelj/staratelj za maloljetnog učenika/šegрта i Općinski načelnik u ime Općine Stari Grad Sarajevo.

Član 13.

Potpisnik Ugovora o stipendiranju je dužan da vrati sav iznos sredstava koja je primio za stipendiranje po osnovu ovog Pravilnika, u slučaju da napusti redovno školovanje ili ako izgubi pravo na dalje školovanje/izučavanje zanata iz neopravdanih razloga, kao i ukoliko se ustanovi da istovremeno prima stipendiju od nekog drugog fonda ili institucije u godini u kojoj je učeniku/šegrtnu odobrena općinska stipendija.

KRITERIJI ZA DODJELU STIPENDIJA

Član 14.

Aplikantima koji zadovoljavaju osnovne kriterije navedene u članu 1. i 2. ovog Pravilnika utvrđuju se dodatna mjerila na osnovu rezultata postignutih u učenju i takmičenjima i to:

1. Bodovi za šegrte:

Šegrtni koji zvanje stižu kod majstora starih zanata boduje se prosječna ocjena postignuta u posljednjem završenom razredu osnovne škole, zaokružena na dvije decimale i pomnožena sa 9 (prosječna ocjena x 9) bodova.

Šegrtni obuhvaćeni ovim vidom obrazovanja u cilju stipendiranja obavezni su dostaviti potvrdu o redovnom pohađanju majstorskog zanata izdatu od strane majstora-obrtnika (registrovan u Obrtničkoj komori u Kantonu Sarajevo) i Izjavu odgovornosti šegrta-aplikanta (šegrta ili roditelja za maloljetnog učenika) o redovnom pohađanju majstorskog zanata.

2. Bodovi po osnovu rezultata u učenju:

- Za učenike prvog razreda srednje škole prosječna ocjena u završnom razredu osnovne škole zaokružena na dvije decimale i pomnožena sa 9 (prosječna ocjena x 9) bodova.
- Za učenike II i III razreda srednjih škola prosječna ocjena u prethodnoj školskoj godini zaokružena na dvije decimale i pomnožena sa 10 (prosječna ocjena x 10) bodova.
- Dodatni bodovi za učenike po osnovu ocjene iz praktične nastave, ocjena iz prethodnog razreda pomnožena sa 5 (zaključna ocjena iz praktične nastave x 5) bodova.

3. Dodatni bodovi za aplikante se utvrđuju i na osnovu slijedećih mjerila.

2.1 Po osnovu rezultata postignutih na takmičenjima iz prethodne školske godine:

Od 1. do 3. mjesta za učenike srednjih škola:

- kantonalno takmičenje od 3 do 5 bodova,
 - federalno takmičenje od 5 do 7 bodova,
-

- državno takmičenje od 7 do 9 bodova,
- međunarodno takmičenje od 10 do 12 bodova.

Za učešće na takmičenjima:

- kantonalno takmičenje 1 bod,
- federalno takmičenje 2 boda,
- državno takmičenje 3 boda,
- međunarodno takmičenje 4 boda.

Član 15.

Svaki učesnik u Javnom pozivu mora biti pismeno obaviješten o rezultatima izbora najkasnije u roku od 15 dana od dana izbora, a nezadovoljni učesnik u Javnom pozivu može podnijeti prigovor za zaštitu svojih prava Drugostepenoj stručnoj komisiji Općinskog vijeća u roku od 8 dana od dana prijema obavještenja.

Odluka Drugostepene komisije Općinskog vijeća je konačna.

PRELAZNE I ZAVRŠNE ODREDBE

Član 16.

Stupanjem na snagu ovog Pravilnika prestaje da važi Pravilnik o stipendiranju učenika/šegрта iz oblasti deficitarnih i starih tradicionalnih zanata/zanimanja („Službene novine Kantona Sarajevo“; broj 11/17.), i Odluka o izmjenama i dopunama Pravilnika o stipendiranju učenika/šegрта iz oblasti deficitarnih tradicionalnih zanata/zanimanja („Službene novine Kantona Sarajevo“, broj 28/19.)

Član 17.

Ovaj Pravilnik stupa na snagu danom donošenja i biti će objavljen u "Službenim novinama Kantona Sarajevo“.



Broj: 02-49-258/20
Sarajevo, Juni 2020. godine